

**NO. SOALAN : 24**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB. TUAN LOKE SIEW FOOK  
[ SEREMBAN ]**

**TARIKH : 13 MAC 2018**

**SOALAN :**

**YB. Tuan Loke Siew Fook [ Seremban ] minta MENTERI PELANCONGAN DAN KEBUDAYAAN menyatakan apakah tindakan Kementerian untuk memastikan tidak ada pemandu pelancong asing (*foreign tour guides*) yang dibenarkan untuk bekerja di dalam negara khususnya dakwaan bahawa pemandu pelancong dari negara China telah “memonopoli” pasaran pelancong dari China yang melawat Malaysia.**

**JAWAPAN : DATO' SERI MOHAMED NAZRI BIN ABDUL AZIZ**  
**MENTERI PELANCONGAN DAN KEBUDAYAAN**

Tuan Yang di-Pertua,

Untuk makluman Ahli Yang Berhormat, Kementerian setakat ini melesenkan 28 kategori bahasa iaitu bahasa Melayu, Inggeris, Mandarin, Jepun, Sepanyol dan lain-lain bahasa. Berdasarkan rekod, seramai 14,373 pemandu pelancong telah dilesenkan oleh Kementerian ini. Daripada jumlah ini, seramai 7,312 pemandu pelancong yang dilesenkan adalah dalam bahasa Cina.

Kementerian juga telah mengeluarkan sebanyak 65 Pas Sementara Pemandu Pelancong diatas permintaan agensi pelancongan bagi menangani isu kekurangan Pemandu Pelancong bahasa Cina semasa musim perayaan Tahun Baru Cina 2018. Pas sementara ini dikeluarkan kepada pelajar yang masih belum menamatkan kursus Asas Pemandu Pelancong.

Untuk makluman Ahli Yang Berhormat juga, di antara usaha-usaha Kementerian untuk memastikan tiada warganegara asing yang bekerja sebagai Pemandu Pelancong di Malaysia adalah dengan menjalankan operasi penguatkuasaan bersepadu dari semasa ke semasa bersama Jabatan Imigresen Malaysia (JIM), Suruhanjaya Pengangkutan Awam Darat (SPAD), Jabatan Pengangkutan Jalan (JPJ) dan Polis Diraja Malaysia (PDRM) bagi membendung isu-isu seperti ini. Operasi penguatkuasaan juga telah dipergiatkan lagi semasa musim perayaan

Tahun Baru Cina 2018 iaitu pada 16 dan 17 Februari 2018 bersama JIM bagi membendung dakwaan isu pemandu pelancong dari negara China.

Sekian, terima kasih.